



**KEMENTERIAN WILAYAH PERSEKUTUAN**  
Blok 2, Menara Seri Wilayah, Presint 2, 62100 Putrajaya  
Tel: 03-8000 8000 Faks: 03-8889 7957  
Laman web: [www.kwp.gov.my](http://www.kwp.gov.my)

---

## **SIARAN MEDIA**

### **UNTUK LIPUTAN MEDIA MASSA**

### **SUKARELAWAN KWP DAN KOMUNITI LABUAN BERSIHKAN KAWASAN PESISIR PANTAI DAN PULAU RUSUKAN BESAR**

**LABUAN, 24 Ogos 2019** – Seramai 100 orang sukarelawan dari Kementerian Wilayah Persekutuan, ahli Puspanita dan komuniti Labuan menjalankan aktiviti tanggungjawab sosial masyarakat (CSR) membersihkan kawasan pesisir pantai Batu Manikar dan juga di Pulau Rusukan Besar. Kedua-dua lokasi yang dibuat kerja-kerja pembersihan ini merupakan kawasan tumpuan para pelancong ke Wilayah Persekutuan Labuan.

Objektif program CSR ini diadakan adalah bagi menyemarakkan semangat kesukarelaan (*volunteerism*) dalam kalangan komuniti dan masyarakat. Selain itu, penganjuran program ini juga dapat meningkatkan rasa kebertanggungjawaban semua pihak dalam memastikan kawasan sekitar WP Labuan adalah bersih, cantik dan indah. Kawasan pesisir pantai dan pulau di WP Labuan sering menjadi tempat terdampar sampah sarap seperti botol air, beg plastik, bekas makanan dan serpihan-serpihan kayu hanyut. Bagi membolehkan WP Labuan menjadi destinasi tumpuan para pelancong baik dari dalam mahupun luar negara, kawasan pantai dan pulau Labuan perlulah sentiasa dalam keadaan bersih. Oleh itu, imej dan persekitaran pulau Labuan perlu sentiasa terpelihara untuk mewujudkan rasa selamat untuk dikunjungi oleh orang ramai.

Aktiviti CSR pembersihan pantai dan pulau juga adalah sebagai merealisasikan kempen kebersihan yang dimulakan oleh Kementerian melalui *Task Force* Kebersihan. Secara tidak langsung program seperti ini akan dapat mendidik masyarakat secara berterusan

untuk sentiasa menjaga kebersihan alam sekitar. Inisiatif ini turut disertai oleh Ketua Setiausaha Kementerian Wilayah Persekutuan, Datuk Seri Saripuddin bin Hj. Kasim yang turut hadir semasa sesi pembersihan dijalankan.

Kementerian Wilayah Persekutuan amat berharap melalui pelaksanaan aktiviti CSR ini membolehkan para sukarelawan dan orang ramai khususnya komuniti Labuan untuk lebih menghargai keindahan Pulau Labuan yang seterusnya membudayakan inisiatif hijau dalam kehidupan seharian mereka. Aktiviti kesukarelaan seperti ini harus dibudayakan oleh semua pihak supaya alam sekitar kita sentiasa terpelihara dan terpulihara.

**Disediakan oleh :**

**Bahagian Komunikasi Korporat**

**Kementerian Wilayah Persekutuan**